



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma :

Tir Yimym


tiryimym@aolima



tir yimym TAPAK 7

Arrla 370 agienba sülen J&K nung lenla ajak tsütsü terenlok lir

Pakistan PM Sharif-i IMF dang sen billion \$1.1 agütsütsü ajungshi



VOL. XX NO. 251 (ADOK 251) DIMAPUR

DIMAPUR

KÜPTOKNÜ (SATURDAY)

AAMI (JUNE) 24, 2023

₹ 5.00

POCSO Act indang sentong ka agi

Kohima, June 23, 2023 (TYO): North East Region (NER) nung POCSO atema Public Prosecution aser Child Welfare police officers atema Hokolbarnü Kohima nung sentong ka agiogo.

National Commission for Protection of Child Rights (NCPCR)-i Nagaland State Commission for Protection of Child Rights (NSCPCR) den yaritepa sensitization cum consultation workshop ayonga agi.

Iba sentong nung Seva Bharati Purbanchal (SBP) ajanga yaritep aser district balala nungi Child Welfare Committees, Special Juvenile Police Units aser District Education Officers aden.

"Linük yongsük nung tanur 40% lir aser parnok ya asen tarutsü anungji parnok kümzüka ayutsüba ya asen tongti teinyaksü aser tebilemsü khuret lir" ta NSCPCR züngsem Akumla Longchari-i ashi.

"Asen nütsüing yongsük 30-40% (tanurtem) kümzüka ayutsüba ya kanga nungdak aser iba ya asen kidang nungi parnok dang tajung mesüra tamajung sayua tenzüksüla" ta Kohima Deputy Commissioner, Shanavas C-ia ashi.

Tanurtemi mapang teimba shisaliok rejutem, kidang aser kiyong nung mapang endoker, anungji tsüraburtem, tesayurtem aser kidangertemi parnok timi anitetsüla, ta pai ashi.

Paisa tanurtem dak tashiyim mapa inyakba, tetsürtem temang anepaluba tesayubatem agütsütsü ayongzük.

Tanurtemi timi kongshiba mesüra timi mesüi kongshiba mebandangteter aser koda masüba tia ajurudang dak alaka loktii menenmetua amshiba

ajanga ibala mesükba tatalokba osang mashir ta Kohima DC Shanavas-isa ashi.

"POCSO Act indang tongtipangtiba mapaji tanurtem dak shi nung tashiyim inyakba aser pornography nungi kümzüka ayutsü atema lir. Tanurtem anogoshia temang aser tekolok timi renlokdahtsütsü atema asenoki lenmang lapoktsütsüla" ta NSCPCR chairperson Alun Hangsing-i ashi.

Tanurtem ya asen linük indang tongtoret lir saka parnok indang tarutsüji yanglutsütsüba asen teinyaksü lir ta pai ashi.

"Tanurtem indang temeten kümzüka ayutsüba nung tsüraburtem dena lir anungji iba tebilemsü khuret abentsüla. Nagaland sorkaria tarutsü Naga putu tajung yanglutsütsü atema bilemstür aser iba atema asenok ajak yaritepsüla" ta Hangsing-isa ashi.

"2019 küm shi nung medemba dena tanurtem dak tashiyim mapa inyakba ken o kar adoka liasü. Ajsüüka 2020 nungi 2022 tashi nung item ken o ajema aküm, iba ya tanurtem temeten kümzüka ayurtemi mapa tajung inyakba mesüra zübazülema inyakba asütsü akok" ta paisa metetdaksü.

Iba sentong nung Supreme Court Advocate aser NCPCR indang Expert Resource Person Shashank Shekhar-ia tajungshi o jembia liasü.

Anogo ka workshop nung POCSO atema Special Juvenile Police Unit and Child Welfare Committees (CWCs) mezüngbuba shilem nung agi aser tanabuba nung District Education Officers, Administration, District Child Units aser CWCs atema agia liasü.

Dimapur kiyong ka nung teloktenji noktanger

Dimapur, June 23, 2023 (TYO): Dimapur nung kiyong kati Unions & Associations maparen inyaksangshiba noktangtsü telemtetba tajung ka agiogo.

Ward-21, Dimapur nung council pezü agi tentetba Ward 21 Welfare Committee nem tashi agütsüba ama iba lemtet agi.

Ward-21, Dimapur kübok colony pezü indang Gaon Buras (GB) aser Council Chairmen külem senden amandang bangjemtepba ama iba telemtetba agiogo ta Ward 21 Welfare Committee-i sangdong ka nung metetdaksü.

"Tashishitsü aketba Unions aser Associations aika tentetba ajanga shishilebabaren nung kanga mejungi kongshir aser parnok nem khuret talila agütsü. Lokti onsara asüba ajanga asen district asoshi tetsükdaksü bentsür arur" ta Committee-i

sangdong nung shia lir.

Iba jagi Ward-21, Dimapur telongtet nung shishilebabaren teloktenji aser unions-i monthly/annual collections aser donations meshiba noktanger aser item mesükba telok shinga inyaksangshi mesüdahtsütsü ta Committee-i ajangajanga metetdaksüogo.

Iba tetuyuba alema inyaksangshiba unions & associations dak onoki tapet mapa inyaksü aser Committee-i tanga wards/colonies den külemi amalitepa inyaksü, ta Convener Dr. Jonah Achumi aser Secretary Omega G. Naga nati sangdong nung shia lir.

Parnokisa district administration dang colony council/GB dang masüngdangtepi item amala teloktem registration/recognition masütsü metetdaksüogo.

LKM 'Nükmenmung' 75 buba amung,

L. Pangersowa Jamir Trust Award agütsü



Chuchuyimlang, June 23

(TYO) : Langpangkong Kaketshir Mungdang (LKM) tenzüka Nükmenmung 75 buba amungba den külemi HSLC tatidang nung tematiba takok angurtem nem tenüngsang agütsüba sentong tajung ka yashi yangi Chuchuyimlang town hall nung agiogo.

LKM lenirtemi ashiba agi, 1948 küm June ita 22 nü M.E. School Chuchuyimlang compound nung Langpangkong nung tersem balala nung azüngertem adenshia Langpangkong Students' Union tenzüka aser iba nungjaji tesülen Langpangkong Kaketshir Mungdang ta melen.

Iba anogoji bilemteta yashi iba kaketshirtem telongjem tenzükdak mongjen Chuchuyimlang nung, LKM 75 buba Nükmenmung sentong den külemi NBSE ajanga agiba class ter tatidang nung Langpangkong nung kaketshirtem rongnung nem tenüngsang agütsüba sentong dena repsema agia liasü.

Taküm 2023 küm

Langpangkong nung kaketshirtem rongnung NBSE ajanga agiba HSLC tatidang nung tematiba takok jenjang 11 nung takok angur ana densema liasü. Tenaji ka Unger nung Wb. Imsongmeren'er jabaso Imnaaküm aser kaji Changtongya nung Wb. Imotiba jala Jungshinungla liasü. Tena nem LKM-i 'L. Pangersowa Jamir Trust Award for Academic Excellence' konang tetushi sempet agütsü.

Iba sentong akhümdong Wb. Akum Jamir, Advocate-i kaketshirtem den tepela aser tajungshi o jembidang, tanü putu nung talisa kaketshir lenirtem ajaki Tsüngrem nungi shisatsü meshia kaketshirtem jenjang ajungketja len shitak anitsü nungdaker ta metetdaksü. Paisa kaketshirtem dang temeim agi kati ka metongshija tajung akümtsü merangtepsü ajungshi. "Pei kija ajungtsü mebilemi tzükong aser alima ajungtsü bilema telongjem, teputep aser yimjung nung alitsü kanga

nungdaka kümogo," ta paisa shisem.

Iba sentong nung LKM Nükmenmung otsü Wb. S.T. Nokdang Longkumer (Rtd. Addl Director, School Education)-i ashi aser LKM Nükmenmung aser HSLC tatidang nung takok tajung angurtem asoshi tenüngsang agütsüba aser temoatsü meshia CTBA nung Associate Pastor Women Wt. Kataroi sarasademtsü.

Iba sentong lapoka LKM Advisor Wb. Imti Longkumeri sarasadem aser Sp. Nüngsangwati-i ken tajung ka aten. Iba sentong shibanga LKM Advisor Wb. Imsüyangeri sarasadem. Iba sentong lenir LKM tongti zülur Sp. Meyitongpang liasü.

Iba sentong ya lipüküm tangatetba nung alima tzü mopong kümzüka ayutsü atema plastic agi yanglubatem akok tashi mamshii munga liasü. Iba sentong amungba indang Langpangkong kaketshir mungdang youtube channel nung angutsü.

White House kima nung PM Modi anema lungkak ait

Guwahati, June 23, 2023 (Agencies): Prime Minister Narendra Modi-i June 22, 2023 nü White House-i aodang pai nisung telok ana ajurua liasü.

South Lawn nung India nung noklang aikati PM Modi pelaa agizüksü atema adenshi saka külen North Lawn nung Black Lives Matter Plaza nung Manipur nungertemi PM Modi anema lungkak aita liasü.

Manipur nung lungkak aiter teimbaka Kuki nung liasü aser parnoki Manipur nung tawa kin anema azütokshiba aser sorkari parnok khuret asoshi mebilemsüba atema ola adok.

Kuki nungeri 'Stop attacking Kuki-Zomi villages' aser 'PM Modi: Hear the cries of Kuki-Zomi, stop the state-sponsored pogrom in Manipur, India' tezülubatem amer lungkak ait.

Prime Minister Modi-i Manipur tensa atema ola madokba atema süoki ia bilemer ta North American Manipur

Tribal Association (NAMTA) züngsem Lien Gange-i ashi.

Prime Minister-i ola adoktsüla aser tensa süngjemdaksütsü atema state semdangtsüla ta Gange-i ashi.

President Biden aser Prime Minister Modi nati külemi osangbener den jembidang Kuki nung indang kecha mejembi Kuki nung lungkak aitertemi ashi.

North American Manipur Tribal Association (NAMTA)-i President Biden dang Manipur nung Kuki-Zomi kintem indang khuret atema mapa inyakang ta shidi ka zülur agüja liasü.

NAMTA-i Manipur nung UN peacekeeping force mapa lemzüksütsü aser meimchir temetentem kümzüka ayutsü mapa inyaksü ayongzük.

NAMTA-isa Embassy of India nem Prime Minister Modi shidi nung Manipur nung tensa mejungi aliba, lisopur ki amakba,

tenla kitem amakba aser Kuki-Zomi kintem atema ketdangsubaren balaka agütsütsü atema shia lir.

Kuki INPI USA media convenor Silas-ia internet connectivity majungba ajanga timtem ajuruba aser azütokshi maparen ajanga par kibong aser lokti timtemba olen ka lemsatop.

White House kima nung lungkak aitertemi Manipur nung President's Rule alitsü, telemsa kecha melii kin ajak nem teyari agütsütsü, nisung taküm samaba atema Justice Committee ka tentetsü aser constitution kübok Kuki-Zomi kintem atema ketdangsubaren balaka tenzüksütsü atema takhangba agütsü.

Manipur tensa kanga mejungi kümogo anungji onoki India sorkar nungi dang masü saka international community nungi teyari meshir aser United States-i meimchir temeten atema noktaksü aser onok yaritsü imlar ta Kuki nunggerisa metetdaksü.

Mahila Thana inyakyim indang seminar ka Chumoukedima nung agütsü

Dimapur, Aami/June 23 (TYO): National Commission for Women (NCW) ajanga sponsor süa Nagaland State Commission for Women (NSCW) aser Dimapur Police Commissionerate den lungjemer "Working, Efficiency and Effectiveness" omen nung ajemdaker June 23, 2023 nü Rhododendron Hall, Police Complex, Chumoukedima nung Mahila Thana inyakyim indang seminar ka agüja liasü.

Director General of Police, Nagaland, Rupin Sharma, IPS ajanga iba seminar ayongzükba nükjidadong rateta ashidangm Women Thana nung inyakyim indang seminar agütsü ya tongtipang lir saka tongtipangtibaji tetsürtem anema mapa tamajung inyakba nübürtem nem angatetdaksütsü, bushisüngdang nung kisüng masü saka criminal justice system, law aser police dak tetsür temi tamang katettsüsa nübürtem nem angatetdaksütsü ya lir, ta ashi.

Police ya ozüing yanglua aliba mapa kuma amshiba agency ka lir, kong police temi tongti shilem agir aser tesüiba küm 20 tsüingta tetsür temeten, tetsür tashi aser tetsür anema mapa tamajung inyakba nungi kumzükka ayuba mesüra tetsür temi mapa tamajung inyakba nung temolung tali agüja arur aser timtem ajurua alirtem maitsü wazüka ayutsü ozüing balala yanglua lir, ta pai ashi.

India nung nisung ka tatongba ajanga police officers rongnung timtem adokdaksüba kisüng masü saka lokti nunga adokdaksür, kong tim masüba tensa ajurua alirtem mesüra

tashiyim amshia shi nung medemba ajangshia alirtem ya maksü ama züingshir, ta DGP Sharma-i ashi.

Yamaji timtem ajura alirtem maksü ama mebilemdaksütsü asoshi nübürtem nem angatetdaksütsü nüngdaker. Iba ama timtem ajurua aliba tetsürtemi ola adokba atema parnok meshidak ta mebilemtsüla saka police mesüra ketdangsur nem metetdaksüba atema tasü tait mapa ama züingshütsüla, ta pai ashi.

Iba ama timtem ajuruba police nem metetdaksütsü asoshi tasü aittsü ajungshira yimya melenshütsü. Timtem ajurur alirtem aser ken o benoker ayak asenoki wazüka ayutsüla aser item timtem ajurua alirtem ajungmesotsüla, ta Sharma-i ashi.

Bushisüngdangba ya nisung kar tai ta kuli bushir masü saka ochi jangjatetsü asoshi lir, kechi atalok iba indang tangatetba tajung nung bushisüngdang tenzüksüla, ta ashi.

Timtem ajurur alirtem mesüra ken o benoker maitsü wazüka ayutsü India nung aliba state kecha nunga mali, anungji timtem ajurur alirtem mesüra ken o benoker tenüing melena codes amshiba ajanga parnok maitsü wazüka ayutsü, ta pai ashi.

Pai officer tem dang record kanga junga anepalua ayutsü ayongzük.

Tetsür anema mapa tamajung inyakba densema mapa tamajung inyakba putetba nung Nagaland police dangar memenep. Nübürtem police dangi arudang parnok police officer ama masü saka alima

nung aliba ozüing ajak madak kibur ama sayur. Anungji officer tem kanga kumdangtsüla, kechiaser nenok mapa ya mapa tamajung inyakba anendaksütsü kisüng masü saka nübürtemi tamang katettsüsa inyaksüla, ta Nagaland DGP Rupin Sharma-i ashi.

Iba sentong nung Chairperson NSCW, W. Nginyeih Konyak-i tarur pela agizükba o jembidang, tetsürtem anema mapa tamajung inyakba tensa azüoktsü nükjidadong nung Mahila Thana ya amenok, ta ashi.

Mahila Thana asoshi tongtipang shilem lir ta angateta National Commission of Women teyari nung NSCW ajanga iba seminar ya ayongzük, kong ken o balala jembia shisa lemsatapa aser ajungshitepba ajanga metokmeperi jangjatetsü aser melenshütsü, ta lai ashi.

Technical session mapang Dimapur Police Commissionerate kübok Mahila Police indang osang tongmelang agi ADCP (Women & Juvenile), Dr. Tiamenla Phom, NOS ajanga agütsü, OC, Women PS, UBI, Rose Yanthan ajanga Management & Working of Mahila Thana indang onük nung ajemdaker jembia, Mahila Thana den mapa tsütsü tesendaktep indang Centre Administrator, OSC, Weri-U Mero-i lemsatapa liasü.

Maneni timtem ajuru alirtem den Mahila Police temi yaritepba indang Director, Prodigal Home, K. Ela-i jembia aser Nodal Officer, DMHP, Dr. Temsuyanger-i 'Workplace stress management' indang jembia liasü.

State Common Selection Board senden ayonger

Dimapur, Aami/June 23 (TYO): Directorate of Technical Education ajanga State Common Selection Board indang senden ka June 27, 2023 anüngdang 12:00 ako nungi tenzükka Directorate of Technical Education, Nagaland indang Conference Hall nung jazükka lir.

Nagaland State Entrance Examination (NSEE) 2023 nung merit nung ajemdaker 2023-24 mapang Para Medical/Agri & Allied course atema Nagaland State reserved seats asoshi candidate shimtsü asoshi iba senden ya ayongzük.

Iba senden nung item züingsemtem ya arua adentsü metetdaksü:

1. Commissioner & Secretary, Department of Higher & Technical Education, Nagaland,
2. Principal Director, Health & Family Welfare, Nagaland, Kohima - Member
3. Director, Agriculture, Nagaland, Kohima - Member
4. Director, Vety & AH, Nagaland, Kohima - Member
5. Director, Horticulture, Nagaland, Kohima - Member
6. Director, Fisheries, Nagaland, Kohima - Member
7. Director, Sericulture, Nagaland, Kohima - Member
8. Chief Conservator of Forest, Nagaland, Kohima - Member
9. Director, IPR, Nagaland, Kohima - Member
10. Director, Technical Education, Nagaland, Kohima - Member

Advisor Tovihoto-i BJYM Bike Yatra tenzüksü



Hokulbarnep Naga Shopping Arcade, Dimapur nung BJYM Nagaland Bike Yatra sentong tenzüksüdang tangokba noksa ka nung MLA aser Advisor, H. Tovihoto Ayemi den par jabaso angur.

Dimapur, Aami/June 23 (TYO): Advisor, Tribal Affairs and Election, Government of Nagaland, H. Tovihoto Ayemi-i Hokulbarnep Naga Shopping Arcade, Dimapur nung NJYM Nagaland ajanga ayongzükba Bike Yatra tenzükja liasü.

Linük nung BJP-i küm toku yimsü asüba nüngtem nung iba sentong ya ayongzük liasü. Iba sentong tenzüksüba mapang, Ato Kilonser Narendra Modi-i aniba BJP sorkar

kumteter küm toku takok ngua anir arur ta nübürtem nem angatetdaksütsü nüngjidadong nung iba sentong ya ayongzük, ta Tovihoto-i ashi.

Ajidang masü linük nung BJP ajanga sentong aser teyari balala agütsüba indang osang prokshitsü nükjidadong nung iba sentong ya ayongzük, ta pai ashi.

Iba Yatra team yagi constituency ajunga ayimjemsü aser nübürtem den ajuruteptsü.

DIG, CID Nagaland Police ajanga CATC-29 semdang



Dimapur, June 23 (TYO): 1 Nagaland Girls Battalion NCC ajanga Sazolie College, Jotsoma nung tang ayongzükka aliba CATC-29 sentong Dr KPA Ilyas, DIG, CID, Police Headquarters, Kohima ajanga June 23, 2023 nü semdanga liasü.

Iba mapang DIG ajanga cadets tem den sensaksema liasü aser Cyber Security nung lecture agüja liasü.

Iba mapang Dr Ilyas-i cyberspace meshidaki amshiba

nung jurila aser temai madoktsüla tongtipang osangtem hack asüba aser temai adoktsüba amala tatishitsü amshia jembia aser item mapa ajanga timtem ajurutsüba indanga cadet tem nem angatetdakja liasü.

Pei sasa cybercrimes nungi jenbua alitsü kanga tongtipang lir, ta pai ashi aser cadets tem dang teti cyber protocol amshia saksalema alitsü ayongzükka liasü.

Paisa cadet aser lanurtem dang cyber security indang kinunger, medemer aser yimtsür-yimertem nem awareness agütsüba tongti shilem agitsü ajungshi aser iba atema mezüngbuba nung cyberspace aser cyber security indang tejangja meteta alitsüla, ta ashi.

Iba sentong nung o jembir nem Col Manjeet Katoch, Camp Commandant, CATC-29 ajanga memento ka agüja liasü.

DC Chumoukedima ajanga CMHIS atema metetdaksür

Dimapur, Aami/June 23 (TYO): Taoba mapang Health and Family Welfare Deputy Commissioner office, Chumoukedima nung Chief Minister's Health Insurance Scheme (CMHIS) kübok pensioner atema registration aser card agütsüba mapa inyaksü, ta Deputy Commissioner, Chumoukedima, Abhinav Shivam, IAS ajanga Hokulbarnep sangdong ka

nung metetdaksü. Iba maparen ya June 30, 2023 nungi July 7, 2023 tashi aser July 12, 2023 nungi July 18, 2023 tashi DC Office Chumoukedima nung inyaksü.

Registration aser card agizüjtsü atema PPO Part I, II aser III photocopies, pa/la dependents indang birth certificate aser Aadhaar Card photocopies bener arutsü sangdong ajanga metetdaksü.

Lok Sabha election nung opposition party 17-i longjemertokteptsü



June 23, 2023 nü Patna nung opposition party tem senden nung Bihar Chief Minister Nitish Kumar, RJD Tir Lalu Prasad, Congress Tir Mallikarjun Kharge, Congress lenir Rahul Gandhi, West Bengal Chief Minister aser TMC Tir Mamata Banerjee, NCP Tir Sharad Pawar aser Delhi Chief Minister Arvind Kejriwal nung adenba noksa nung angur.

New Delhi, June 23 (Agencies): 2024 küm Lok Sabha election nung opposition party 17-i longjemer BJP anema tokteptsü telemteba agiogo.

Hokolbarnü Bihar yimtiba, Patna nung Bihar Chief Minister aser JDU tongti lenir, Nitish Kumar-i ayongzükba opposition party tem ghonda pezü senden amenba sülen sangdong ka ajanga opposition party temi lokteper tokteptsü, ta metetdaksü.

Taküm April ita nung Nitish Kumar den senden amending sangküm Lok Sabha election nung BJP anema opposition lokteptsü atema Trinamool Congress (TMC) tongti, West Bengal Chief Minister, Mamata Banerjee-i apiteta liasü.

Tesüiba ita ishika tsüingda Nitish Kumar-i state balala semdanga Opposition lenirtem

ajurua liasü. Iba sülen Aam Aadmi Party (AAP) convenor aser Delhi Chief Minister, Arvind Kejriwal-ia opposition lenir aika ajurua Delhi ordinance anema AAP pusemang, ta mepishia liasü.

Hokolbarnü senden nungsa Opposition lenirtemi maneni Himachal Pradesh kübok Shimla nung senden mena opposition teloktep atema külem onük renemtsü bangjemogo.

Senden tembangba sülen Nitish Kumar-i, "Linük atema onok longjemogo; Centre nung tashi alirtemi linük anema inyaker. Taruba opposition party tem sendenji Shimla nung amentsü aser tarutsü atema asalentong yanglutsü," ta metetdaksü.

Nitish leniba nung amenba senden nungji Opposition lenirtem- Mamata Banerjee, Congress Tir Mallikarjun

Kharge, Congress lenir Rahul Gandhi, Kejriwal, DMK tongti aser Tamil Nadu Chief Minister, MK Stalin densema lenir aika aden.

Senden tembangba sülen osangbenertem den jembidang Congress Tir Kharge-i, opposition party 17 atema külem onüktemji taruba senden nung lemtetsü, ta metetdaksü.

Jammu & Kashmir Chief Minister Omar Abdullah, PDP tongti Mehbooba Mufti, Mamata Banerjee, Punjab Chief Minister Bhagwant Mann aser Stalin nungbero Brihostibarnü Patna yimti tonga arua liasü.

Asa senden nung Jharkhand Chief Minister Hemant Soren, Samajwadi Party Tir Akhilesh Yadav, Maharashtra nung taoba CM Uddhav Thackeray aser NCP Tir, Sharad Pawar nung aden.

Modi-i semdangba ajanga India-US tesendaktep tajungba akümtsü: Kamala

Washington, June 23 (Agencies): Tang mezüing Ato kilonser, Narendra Modi-i official süa US semdangba ajanga linük ana tsüingda space, defence, technology aser supply chains tsütsü tesendaktep ano tajungba akümtsü, ta US tatong tir Kamala Harris-i ashi.

India nung Ato kilonser kati US Congress nung anaben tashi jembiba mezüingbuba Ato kilonserji Modi lir. 2016 küm nunga pai US Congress nung jembia liasü.

Kamala Harris indang office twitter ajanga, " US-India partnership ya tang tashi taitba lir. Longjemer asen linük anati azükaruba, kümzüka aliba aser anema aliba lima ka atema tarutsü jengang yanglutsü," ta metetdaksü.

"Aso 21buba nung US aser India na tsüingda partnership ya tongtibangtiba lir, aser tang pai semdangba ajanga space,

defense, technology aser supply chains tsütsü tesendaktep ano tajungba akümtsü," ta kasa sangdong ajanga metetdaksü.

"Tan Aso atema asen partnership ya kanga tongtibang aser tashi tulu keta lir. Tarutsü nung sector balala nung asenok amalitepa inyakba jengang ano tajungba akümtsü ni imlar," ta lai metetdaksü.

US Tir Joe Biden aser pa kinüngtsü Jill Biden nati jaokba nung ajemdaker Ato kilonser Modi-i June 21 nungi tenzüka June 24 tashi US semdang.

Brihostibarnü White House nung Ato kilonser Modi nungtem nung ayongzükba chiyungba sentong nung Kamala Harris, industrialist Mukesh Ambani, Google CEO Sunder Pichai aser Apple CEO Tim Cook nung densema nungtugu nisung aika aden. US Tir aser pa kinüngtsü nati ayongzükba sentong nungji tejaoker 400 dak tema aden.

Arrla 370 agienba sülen J&K nung lenla ajak tsütsü terenlok lir: Amit Shah



June 23, 2023 nü Jammu nung Union Home Minister Amit Shah den Jammu & Kashmir Lt Governor Manoj Sinha, Union Minister Jitendra Singh aser J&K BJP Tir Ravinder Raina nung lokti senden ka nung adenba noksa nung angur.

New Delhi/Srinagar, June 23 (Agencies): Hokolbarnü Union Home Minister, Amit Shah-i, Arrla 370 agienba sülen nungi tenzüka Jammu & Kashmir nung lenla ajaklen terenlok lir, ta ashi.

Paisa Kashmir nung lanurtem dang lung masü saka pen aser laptops amshitsü ajungshi.

Srinagar nung anogo asemnü Vitasta Festival benjung nung jembidang Amit Shah-i, tesüiba küm 40 tsüingda Jammu & Kashmir puti otsü metetertemi Kashmir ya disputed mesüra 'disturbed area' ta dang meteta lir, ajisüaka tangbo yangi yimjung lir, ta ashi.

"Kashmir ya tesüiba mapangtem nung azü toktsüba ajanga takoksa anguba lima ka lir, saka tangbo tashi itta kümogo aser yimjung lir," ta pai ashi.

Tesüiba küm 30-40 tsüingda Kashmir nung kiralongra ajanga nisung 40,000 jungnüa süogo, saka tanübo kasa Kashmir nung Vitasta benjung amonger aser tejakleni aoer, ta pai ashi.

Union home minister-isa Kashmiri lanurtem dang Kashmir nung sobaliba takar senmang mamatoktsüla, ta ayongzük.

Kashmir nung mapang shia longkak aidang lanurtemi lung amshia sepaitem den raraba dak sendakba nung pai, "Nenok nem raraba hadir aser lung agütsürtemi nenok atema kodanga mebilemstür. Nenok ket nung lung masü saka pen, laptops aser kakettek alitsüla," ta ashi.

Paisa Kashmiri nung sobaliba ya Vitasta (Jhelum) ayong den medemdanga, "Shingia Kashmir puti otsü shidak memetet; yangi tesempa maliasü. Kashmir-i arurtem ajak pelaa agizük," ta ashi.

Home minister-isa, Jammu & Kashmir nung Arrla 370 agienba sülen nungi lenla ajak nung terenlok lir, ta metetdakja terenlok mapa balala metetdaksü.

Vitasta benjung ya kanga nungtugu Dal awatsüing anasa Sher-i-Kashmir International Convention Centre (SKICC) nung ayongzüka agir.

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND: KOHIMA

NO.DET-2/14/2001/PT-II/ **Dated Kohima, the June, 2023**

ADVERTISEMENT

Application in the prescribed form is hereby invited from bonafide local candidates for undergoing training at various Govt. Industrial Training Institutes under Craftsmen Training Scheme for the session 2023-2024/25. Name of the Institutes, sanctioned trades, duration of courses and minimum Educational qualification required are given below:

SESSION: 2022-2023/24

Sl. No	Trades	Duration of Course	Minimum Educational Qualification	Seating Capacity	Name of Govt. ITIs	
A. Engineering Trades						
					*NCVT	*SCVT
1.	Wood Work Technician (Carpenter)	1 year	8 th Passed	24 each	Kohima, Phek, Wokha, Tuensang.	Kohima, Mon, Kiphire
2.	Plumber	1 year	8 th Passed	20 each	-	Kohima, Phek, Zunheboto.
3.	Welder	1 year	8 th Passed	20 each	Kohima.	
4.	Mason (Building Constructor)	1 year	8 th Passed	20 each	-	Kohima.
5.	Mechanic Diesel	1 year	10 th Passed with Maths & Science	24 each	Kohima.	Tuensang
6.	Electrician	2 years	10 th Passed with Maths & Science	20 each	Kohima	Mon, Zunheboto
7.	Draughtsman (Civil)	2 years	10 th Passed with Maths & Science	24 each	Mokokchung	
8.	Mechanic Motor Vehicle	2 years	10 th Passed with Maths & Science	20 each		Mokokchung, Phek
B. Non- Engineering Trades.						
					*NCVT	*SCVT
1.	Basic Cosmetology (Hair & Skin Care)	1 year	10 th Passed	20 each	-	Kohima, Dimapur, Phek.
2.	Computer Operator & Programming Assistant (COPA)	1 year	10 th Passed	24 each	Mokokchung, Zunheboto, Mon.	Kohima, Dimapur, Wokha.
3.	Knitting	1 year	8 th Passed	20 each	-	Kohima, Mon.
4.	Sewing Technology (Cutting & Sewing/ Dress Making)	1 year	8 th Passed	20 each	Dimapur.	Kohima, Mon, Tuensang, Wokha, Phek, Kiphire, Zunheboto.
5.	Stenographer Secretarial Assistant	1 year	10 th Passed	24 each	-	Dimapur, Mokokchung.

***NCVT- National Council for Vocational Training (Under Central Govt.)**
***SCVT- State Council for Vocational Training (Under State Govt.)**

N.B:

- Candidates applying for admission must be above 14 (fourteen) years of age as on 1st August, 2023 and there is no upper age limit.
- Application forms will be available w.e.f 26/06/2023 from respective Govt. ITI on all working days during office hours.
- There will be 2 units for the trade of Carpenter and Sewing Technology in ITI Kohima, 2 units for Stenographer Secretarial Assistant in WITI, Dimapur and 1 unit each for rest of the trades.
- Cost of application form is **R. 50/- (Rupees Fifty) only.**
- Last date of submission of form is **14/07/2023.**
- Date of Entrance test : a) **19th July' 2023 – Non Engg. Trades:** - Morning - 10:00 am (under Matric Trades)
- Afternoon - 12:00 pm (Matriculate Trades)
b) **20th July' 2023 – Engg. Trades :-** Morning - 10:00 am (under Matric Trades)
- Afternoon - 12:00 pm (Matriculate Trades)
- Entrance Test result will be declared on **27th of July, 2023.**
- Only women candidates need apply for Women ITI, Dimapur.
- Selected candidates will be paid stipend @ **R.500/-PM.**

Sd/-
KOVI MEYASE, NCS
Additional Secretary, & Ex-Officio Director (HoD)



TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI 24, 2023

Asen lima menenba janaona!

Küm 100 jakdang temesüng nisung asen limai arudang asenok aikati tanü dangtsü nung pei jak mangu, merükmejutsü memetet kidang kiset shiruru den külemi liasü. Tejak meyitsü, tebang shitoktsü aser tetsüng mittsü junga memetetba purtem liasü. Tzü chigubaji ayong nung temang metenba dak alaka sapon amshia tzü chigubabo tangashia mangashidang, saponji kechiar memetet aliba purtem agi tanübo temang merükmejua alitsü meteta benshiba dang masü saka tejak tebang merüktsü aser topur ajungtsü asoshia mozü tanak, temerem aser temesüng tapu balala bendena ateper. Iba denji külemi asenok achiajem aser abensüoshi agiba yimya maparen ajak asenok dang sayur temesüng nisungtem den kasasa kümogo. Ajsüaka, asenok nisung mesüka libalirutsü meteta nüchi kümer küm noklang ajungba sülena asenoki mangazüktetba aser mebenshitetbaji asen janaona endokba aser sali metsü metsütsü mashiba mapa ana ya asütsü. Asenok ki tajung nung aliba, chiyongtsü jungjunga awazür achiba aser gari tajung nung mener senzüba apibo asen lima tesem kecha nunga 'YANGI JANAONA TEINDOK', 'YANGI METSÜ TEMETSÜ' ta zülua makatsüla amato bilemer. Ajsüaka, mejaka ao majung, asenok alidak lenjem aser lenku ajak nung item tekümdangtsü aser temetettsü o tem ya ojang tulu agi zülua yuja angur. Iba jagi tangar bendangertem dang asen libaliru yimya indang sayur. Asenok tsüraburtem aika anepdang yakta saaka kima kilong ajak aoker aser janaona bendenbaji tanemi polythene bag nung seper bener ao tangar kima aser kilentzü nung endoka toktsür. Ano, kibong karibo pei kidang oktenba janaona ajak bendena aleper gari nung bener orr tangar kiyong nung toktsür. Atangji, iba jagi asen ki aser kimabo temerük saka tangar kima aser yimti yimdongbo asenoki menentsür. Ano, lanurtema aika gari tajung nung mener temesüng oshi jembia ice cream, chips, juice, cokes aser chocolates tajungtiba alia chiajema jajadang gari nungi item chiyongtsü teküp aser bottle tazüng merepshia endoka jajaba agi yimti yimdong aser alima janatsür. Iba jagi asenok tereprangtsü nung tashitemetet amai reprangaka asenok mapa agi asenok ya mashimalu aser mashimemetetba purtema ta sayur. Asenok alidak tesemtem nunga nisung kari yimti topur jungdaktsütsü atema süngdonglidong aser naro tema yutsütsü, saka kari item ajakji nembanga janaona endoktsü. Ano, nisung kari nübortem anisüngzüka amendak aser angati tzü tajemtzü tajung angudak yanglua toktsütsü saka kari itemji kecha hau ta mali perepzüka bener aotsü, kari sali metsü agi metsübanga yutsütsü, ano karibo item ajakji tongdanga shishilembaa amentsü. Item jakla yimyatem jagi asenok ya sapon amshia tzü chiguba agi aser tejak meyir tenük, tebangmechi aser tenipong nung mozü atepba agi temeteter aser tangateter amai sayur dang ashi, asenok merükmejuba aser tepshitepraba ajakji ak tzü chigur khen anü wanga kazür amai lir. Asenok aikati takarbo kanga shisangner asünungji, sentsüang tsüa aliyonga aser asen kidang okdenba janaona ajak to tangar kima aser kilentzü nung oa endoker nisung asüyonga, tenarong aser teku ajak tazüka alua hon azük aser earing enoker kilong nung aser kimalen mashi mashi nung sali metsü metsüa jajar. Item jagi asen lima aser asen yimti arar. Ashiko, ibaji asenoki asenoksasa tangatetter aser temetetter akümtsü meranger masü saka takar akümtsüang merangtepba ajanga asütsüa akok. Ozü ki aser kima merükerbo ojang, kidang okdenba janaona ajak oagi tangar kimalen tesem tera sadema alidak ka nung endoktsü. Kü mang nung hon zülöker gari tajung ka nung chiyongtsü tajung chia senzütetra ojang, yimti yimdong sünga janatsüyonga taoker lir ta bilemba taila tashitemetetertem, taila tulus aser tulutsür aser taila tanishirtem agi asen lima süngogo. Item janajibo asen kidang okdenba janaona dang nungi tamajungba. Item jana aliba jagi asen lima aser asen yimdong menen manener.

OLEMSABANG

Kechiba tzü peria ajemtsüla (?)

- Internet source -



Asenok ajaki metet, asen temang touzük shilem 70 bo tzü ajanga lir, anungji temang anema alitsü asoshi tzü peria ajemtsü nungdaker.

Asen temang shilem ajak nung tzü lir saka tebokbok aser tekolok nunger amala nung timba lir. Asen temang nung digestive systems ajanga azü aser metsü densema tzü tapu balala adokdaktsür.

Aiben asenoki tzüraba mapang nungang asen temangi tzü nungdaker ta bilemer. Ibajia shitak saka tawa research agiba ajanga bushitetba agi asen temang nung shilem balalai tzü nungdakba temaitsü aika sayur, aser item temaitsütemji asenoki memetetba ajanga temang nung tashitak aika adoker.

Nisung aika Air-Condition (AC) nung mapang talanglang mapa inyakba mapang metzürar, saka ibaji ajanga asen temangi tzü menungdaker ta mangatetsüla. Tzü peria majemba ajanga-a temang tashi meiti luladoker. Anungji na temang anema alitsü aser sentsü junga akümtsü asoshi tzü peria ajemtsüla.

Aonsotsü mesüra süngdong ka aintsü asoshi tzü nungdakba den kasa asen temang aintsü asoshia tzü nungdaker. Asen temang cell telung aser tema naprongla nung tzü peria ayimba ajanga asenok tashi itdaktsür.

Tzü ajanga asen temang tenük-telen ajak liromedemdaktsüba den külemi temang temperature-a liromedemdaktsür. Iba dak alia asen temang nung aliba mim (toxins) densema temang nung aliba tamajungtem asentzü, scü aser natzü ajanga indoker.

Teküp asoshia tzü nungdaker. Anogoshia nisung tain ka temang nungi tzü litre 4 shi indoker, anungji tajemba agia iba denji kasa tzü ajemtsü nungdaker.

Süngmok süngo ajemba tajangzük



1. Ovarian cancer anepaludang amshir.
2. Colon cancer noktanger.
3. Anepdang shirangba jungdaktsür.
4. Motion sickness yarir.
5. Tashitsü atuba aser awakba süneptsür.
6. Tepinpang ashiba süngjemtsür.
7. Migraine jungdaktsür.
8. Tetsürtem azü aodang tashitsü atuba anentsür.
9. Yimra-wara nungi kümzüker.

Source : Internet

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Impur nung toklang tenzükertem counselling training agi



Impur, Aami/June 23 (TYO): ABAM Church & Mission ajanga ayonga Home Evangelist aser Toklang Tenzüker Counselling training June 21 - 23, 2023 anogotem nung Impur nung kanga takok ngua agiogo, ta ABAM Executive Secretary, Rev. Dr. Mar Pongerner-i sangdong ka ajanga metetdaksü.

Iba training nung Arogo 22 nungi tenzükertem 49 arua aden.

Tanü kija aser kibongtem nung tensa tia balala ajurudang kokteta tiptema alitsü asoshi kangasa nüngdakba Arogo nung mapa kaji iba ya lir. Tang Arogo nung shilem tulu ka agiba aser tongtipang mapaji ya ka, ta angateta iba sentong ya ayonga

agiogo.

Arogotem nung tenzükertemi tangazükba tulu ngur oa inyakdang kija, kibong aser lokti nung tensa tia balala ajurudang tangatetba tajung nung ajak kokteta aotsüsa inyaktsü amanger.

Iba sentong nung shisalen sayurji Dr. Moa Imsong Counsellor, DABA liasü.

May ita kija nung Nigeria nung Khristan 700 tepsetogo: Intersociety

June 23, 2023: Taküm May ita kija nung Nigeria linük nung Khristan 700 dak tema tepsetogo, ta Brihostibarnü Anambra nung amenoka aliba melungtet telok- International Society for Civil Liberties & Rule of Law-i metetdaksü.

Iba ya Nigeria puti otsü nung Khristantem azü tokshiba tamajungtibaji rongnung densema lir, aser linük nung Khristantem teimtiba asüba tesemji north-central Plateau State liasü, talisa Mangu county liasü, ta kasa report ajanga metetdaksü.

Plateau State nung anogo asem (May 15-17) tsüngda kija nung Khristan 300 tepset,

Taküm April 12 nungi June 12 tashi nunga Jihad teloktemi Khristan 1,100 tepsetogo, aser ibaji anogo shia Khristan 17 tepsetba den kasa lir, ta kasa osang ajanga metetdaksü.

Christian criminologist, Emeka Umeagbalasi-i tentetba Intersociety teloki Nigeria nung media aser international media den tamangba yimsü organizations, lokti tentet balala, security channels, research, i n t e r g o v e r n m e n t a l organizations, melungtet teloktem, meimchir temeden atema inyakba teloktem aser international parliamentary organizations nungi osang balala bendena iba report renema liasü.

Nigeria nung Khristantem aser meimchir temeden atema inyakba teloktemi linük nung Khristantem reshikangshiba anema tesüiba küm aika ola adoka arur.

Nigeria nung talisa Middle Belt states nung Fulani Muslim

teloki aluyimer Khristantem aika tepseter. Iba dak alia Islamic kiralongrar telok balala aser auer teloktemi Khristantem tepsetba den Khristantem puer oa sen akhanger.

Khristantem teimba asüba state ji Plateau state lir, aser tanabuba state ji Benue state lir. Taküm May ita nungi June ita tetenzüklen tashi nung Benue state nunga Khristan 110 tepset. April ita 12 nungi June 12 tashi nung Benue state nung Khristan 190 tepsetogo.

Tasembuba state ji Kaduna state lir. Iba state nung May-June ita nung Khristan 100 dak tema tepset. April 15 nüa iba state kübok Runji yimdak Khristan 33 tepseta liasü.

Southern Kaduna Peoples' Union-i ashiba agi, tesüiba küm trok tsüngda Kaduna state nung Fulani teloki Khristan 245 puer ao.

Nigeria nung April nungi June ita tashi nung Tenla ki 100 dak tema rongdoktsüogo aser iba nungji Plateau state kija nung Tenla ki 28 rongdoktsüba densema lir.

May-June ita nung Nigeria nung pastor 20 shi puer ao aser karbo tepsetogo.

May-June ita nung state balala nung Khristan 1,400 puer ao aser teimtiba puer aobaji Kaduna state nung liasü (Khristan 700 puer ao); Niger state nunga Khristan 300 dak tema puer ao.

Taküm April ita nung Intersociety-i, taküm küm tenzükertem mezüngbuba anogo 100 tsüngda Khristan 1,041 tepset aser Khristan 700 dak tema puer ao, ta metetdakja liasü.

2022 küm alima nung Khristantem teimtiba tepsetba linükji Nigeria liasü. Yaküm Nigeria nung Khristan 5,014 tepsetogo (Open Doors' 2023 World Watch List report).

Tang alima nung Khristantem alitsü tamajungtiba linüktem rongnung Nigeria ya jenjang 6buba nung lir; 2022 küm nung jenjang 7buba liasü aser tangbo jenjang 6buba kümogo (Open Doors' 2023 World Watch List report).

Koinonia Baptist Church nung Vacation Bible School (VBS) agi



Kohima, June 23 (TYO): Koinonia Baptist Church (KBC) Sunday School Department-i ayongzüka June 21 nungi June 23 tashi Vacation Bible School (VBS) agiogo; VBS ya 'Kati ka tenzüktepang' (Galatia 5:13) omen nung ajemdaker agi.

VBS tetenzük sentong nung KBC SSD Superintendent, Belinda Kiewhuo-i VBS akaba nükjidong ya tanurtem Khrista dangi anir arutsü, Tsüngrem O sayutsü, Khristan taküm ka koma alitsüar sayutsü aser Arogo nung shilem tajung agiba den Khrista kulisüba mapa aser mission mapa inyaktsü jangradaktsütsü nükjidong nung ayongzüka, ta metetdaksü.

ANOGO ABEN TSÜNGREM DEN

Asütsü Mulungba (T.Ken 143: 1-12)

Kodang asenok timtem ajanga odir asenoki koda sarasademtsü? Asenoki Dawid sarasadem nung temepishiba kar angur, aser asenoki Pa tatishi nung ora, Tsüngremi asenok timtem ajanga asenok temoatsü dangi anitsü.

Mezüngbuba, pai ashi, "Kü sarasadem angang" (t.1), aser "Kü dang yakta langzüang, O Kibuba, kü nela lular" (t.7). Asenoki Tsüngrem dang ayimtentsü mali; asenoki Pa den O langteptsü mali. Asenok tongmelang agi Pa dangi aotsü aser ashitsü akok, "Kibuba, kü dang angang". Kodang tanur ka tebu mesüra tetsü dangi arudir, tsüraburi tenarong pa tsütsü lapoktsür. "Kibuba tenük temeshipur tsütsü lir, aser Pa tenarong parnoki ayimtenba nung lapoktsür" (T.Ken 34:15). Tanü na kechi agi shisabuludaktsür iba asoshi Kibuba dang sarasademer asü?

Dawid tanabuba temepishibaji, "Anepdang ne temeim yimlibilem kü nem angashidakjangma, kechiyong ni Ne dak amanger" (t.8). Ano, "Kü den jembidang, Kibuba" ta ashitsü akok. Anepdang shia Dawidi Kibuba O nung shisadang, aser Tsüngremi pa ani. Nai Laishiba azüngba nung mapang indokdarma aser iba züluri ne den jembidaktsüdar ma? Pai na aotsüba leman sayutsü.

Tasembuba Dawid temepishibaji, "Kü tsükchirtem nungi, O Kibuba ni kümzükangma" (t.9). Tsüngremi asenoki jajatsüba leman nung jajara Pai ibaji inyaktsü akok. Tekong 10 nung Dawidi teyuba aser len anitsü asüngdang. "Nai mulungba inyaktsü kü dang sayuangma, kechiyong na Kü Tsüngrem lir; Ne tanela tajungi ni lenden leman nung anidakjangma". Pai ibaji inyaktsü koda mulunga lir!

Tatamsa Dawidi ashi, "Ne tenüng atema, O Kibuba, kü taküm kümzükang" (t.11). Kechiba asenoki Tsüngremi asenok timtem nung anitetdaksünür? Atangji asenoki teyari aginür, saka ano asenoki Pa sentsüwangshi sudadaktsütsüla. Pai sentsüwangshi ajak agizüktsü asoshi Pai asenok kümzüdaktsütsüla.

Na tetendangba ajanga aodang, Tsüngrem dang teyari asüngdang, Pai na timtem ajanga anitsü. Teti Pai teyuba nung alitsü mulunga liang. Tsüngremi Laishiba ajanga ne den jembitsü Pa dak amangang, aser Pai asenok asoshi kechi tajungtiba agi inyaktsü.

VBS ajangasa Sunday school yangertsü, lanurtem anitetsü aser Khrista temang nung akasodaktsütsü atema lir, ta Belinda-i metetdaksü.

VBS tetenzük sentong nungsa Sunday School Silver Jubilee Celebration (1998-2023) sangdong, KBC Senior

Pastor Rev. Zotuo Kiewhuo-i temoatsü meshia sarasadem aser Intermediate aser Junior students-i Jubilee ken aten.

Tekülem sentongtem nung Tsüngrem O jembirtemji Senior Pastor Rev. Zotuo Kiewhuo, Pastor Medotseilieü Kiewhuo aser Pastor Neibalie Kiewhuo nung liasü.

VBS nung Best Students awards class telemsa balala

nung Thejasetuo Seyie aser Yilobeni Kikon na (Intermediate), Vesato aser Rebecca na (Junior), Neithozo Mekro aser Lakuo na (Primary) aser Thejasevor aser Neitseinuwo Rutsa (Beginners) nung nem agütsü.

Camp director ji Visazo Seyie liasü, lanur teloki tekülem aser tetushi ani aser Women Fellowship leniba nung sarasadem den lumiba sentong agi.

Anogo asemnü sentong nung Beginner, Primary, Junior aser Intermediate class nungi nisung ajak senteper 450 aden.

Kasa sentong nung Koinonia Baptist School nungi kaketshirtem-a aden.

**AO OSHI ANGAZÜKDAK:
TANÜ ANGAZÜKTSÜBA OJANG**



Ratamata

(v) atidaka bilem, temulung malem (doubt)
* Ni kecha ratamata melii Tsüingrem nem tenla agütsü.

Ratep

(adj) sü aputepa ara (mix weaving pattern)
Kütsüi sü tapu ana ratepa ara.

OLONG PAITEP # 6555

15x15 crossword grid with numbers 1-18 indicating starting positions for words.

TIPILEN

- 1. Lapok / Tenzük - (4)
- 6. Tarutsü indang tetzü - (4)
- 7. Yimer ajak - (7)
- 9. Ishika dang - (4)
- 11. Terongtong aser tepi tetsüingda - (7)
- 12. T _ _ _ _ i - (4)
- 15. Tsürabur nungi lemezükba - (7)
- 17. Tetsür tanur dang ajaba - (4)
- 18. Shirang ajung - (4)

LANGTSÜNGLEN

- 2. Pei tasoli - (3)
- 3. Iba anogo - (4)
- 4. Telemsa ka - (6)
- 5. Maneni - (3)
- 7. Tekaratiba nung - (5)
- 8. Ki temalen - (5)
- 9. Temejung - (5)
- 10. Teimla aka - (5)
- 11. Tajatsü - (6)
- 13. Molung - (4)
- 14. Anogo semer ka - (3)
- 16. Tashi balaka - (3)

OLONG PAITEP # 6554 TELANGZÜBA

TIPILEN :

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso,

LANGTSÜNGLEN :


- 1. Alimang, 2. Pongen,
- 3. Samaru, 4. Nün, 6. Pio,
- 9. Nüngdak, 10. Yongya,
- 11. Kongro, 13. Ora, 14. Ata.

NAI-A YA METETTER MA



- 1) Alima nung 'chewing gum' tejentibaji küm 9000 tema lir.
- 2) Tanga chiyungtsütem dang nungi nisung teimbaka allergic agi kangshibaji nashi mamatzü ajanga lir.

Noksa nung meputepi aliba 6 bushiang



Assam tzümetsüng tensa tamajungba akümer; nisung 1 asü

Guwahati, June 23, 2023

(Agencies): Assam nung tzümetsüng tensa kanga mejungi kümogo aser tanü nisung ka asü aser nisung lakh 5 jungnüa timtemer.

June 22 tashi nung nisung 4,95,799 tashi tzümetsüng ajanga pei talidak toktsür ogo aser Tamulpur nung nisung ka asü.

Udalguri district kübok Tamulpur nung nisung ka tzü nung arakset ta Assam State Disaster Management Authority (ASDMA)-i metetdaksü.

Tanü tashi nung Baksa, Barpeta, Chirang, Darrang,

Dhubri, Dibrugarh, Kamrup, Kokrajhar, Lakhimpur, Nalbari, Sonitpur aser Udalguri district tem nung nisung 4,95,799 tashi tzümetsüng agi timtemer, ta ASDMA bulletin nungsa shia lir.

Tzümetsüng agi tamajungtiba kongshiba district ji Barpeta lir. Iba district nung nisug 3,25,600 timtemer, parnok sülen Nalbari nung nisung 77,700 aser Lakhimpur nung nisung 25,700 tashi timtemer.

Ketdangsürtemi district 7 nung relief camps 83 lapoka lir aser item nung nisung 14,035 jenoka lir. Maneni, district 8 nung

relief distribution centres 79 lapokogo.

Tesem balala nung paramilitary forces, NDRF, SDRF, Fire and Emergency Services (F&ES), civil administrations, NGOs aser local nisungtemi nisung 561 kümzükogo.

Tesüiba ghonda 24 tsüingda ketdangsürtemi jang, dal, metzü quintal 1,265 aser mustard oil 5,269.80 litres lemogo.

Tanü tashi nung yimsüing 1,366 tzi agi mobanga lir aser tsünüsenbongtsü 14,091.90 hectares raksaogo.

Imphal nung tetsür 2000 temai CBI telok noktang

Imphal, June 23, 2023

(Agencies): June 22 nü tetsür 2000 temai Central Bureau of Investigation (CBI) telok Manipur Police Training College (MPTC) Pangei-i meyoki noktanga liasü.

MPTC armoury nungi prangpong-injang auya bener aoba bushisüingdangtsü atema CBI telok ka aru.

Ajisüaka yashi nikongdang 2:00 ako meta tetsürtem main gate nung adenshir lungkak ait aser parnoki CBI telok meyoki

noctang.

CBI telokji nikongdang 3:30 ako meta aru saka parnoki bushisüingdang mesüteti meyipa ao.

May 3 nü nisung telok kati MPTC Pangei nungpoka atu aser armoury nungi prangpong-injang auya bener ao. Iba tatalokba sülen Heingang Police Station nung ken o ka benok aser bushisüingdang tenzuka liasü.

May 4 nü mejangjaba nisung kari Kangpokpi Police Station

nungi prangpong auya bener ao aser iba ajanga Manipur kübok lendenlen kasa mapa inyakyonga ao. Nisung teloktemi armouries, police stations aser battalions nungi prangpong-injang aika auyazuka bener ogo.

Iba tensa atema CBI telok ka June 21 nü Heingang Police Station-i aru. Parnok ta kulikaket aser osang bendentsü atema aruba liasü saka tetsürtemi noktanga ajanga parnok mapa meinyaktet.

Nübertemi PA Sangma Stadium atema ashishiteper

Shillong, June 23, 2023

(Agencies): Tura kübok Dakopgre nung yangluba PA Sangma Stadium atema ita 6 shi ka nübertemi ashishitepa arur.

Iba stadium dang mezüingbo MP Stadium ta aja aser iba sülen Dikki-Bandi stadium ta melenba sülen tangbo PA Sangma stadium ta ajar.

Ajisüaka tawa iba stadium atema nübertemi ashishiteper. Taoba NPP-i aniba MDA sorkari iba stadium meyangluzükdang yonga lapokba atema nübertem ola adoka liasü. MDA sorkar tanaben akümba sülen Badri Rai Constructions (BRC) nem mapa lemezüktsü aser parnoki inyaka arur.

Construction company-i stadium kinük pezüprong tudoker aser iba ajanga stadium

lendonbang nung lir iba tesem nung alirtemi ashir.

Iba stadium indang retaining wall külen chirepba atema yashi Tura MP Agatha Sangma-i iba tesem semdanga liasü.

"Iba stadium ano meyangluzük saka paksa a aer kechiyong parnoki rods peria meinok. Onoki parnok (construction company) dang 10 mm rods amshitsü ashi saka 6 mm dang amshi. Iba stadium ya assembly building tasen chirepba ama achitsü" ta iba tesem nung alir kati Agatha Sangma dang ashi.

Stadium yangluba mapang onok telungi meyoker. CRPF sepaitemi kishi ajak nung anüker aser tarur ajak meindoker. Iba inyakyim ya under construction project ka nungbo shitak saka lapokadoker aliba complex ka

atemabo tim masü lir, ta paisa ashi.

New Tura Development Forum (NTDF) ta ser teintet rogo kari stadium yangluba asoshi tebilemstü abenba lemsatepogo.

"Parnoki Bhutan nungi lung tamajung bener arua amshiba aser Ringrey River nung lisem tuteta agiba anema police tsüingdang ken o ka benoka liasü saka onok amokmeren. Tang iba jungkaiji adoker" ta general secretary, LC Momin-i ashi.

Chief Minister Conrad Sangma indang office nungi sangdong ka nungbo iba mapa ya Hindustan Steelworks Construction Limited ajanga inyaker ta ashir saka mapajibo Badri Rai & Company ajanga inyakba angur.

Assam nung nisung 4-i Sahitya Akademi Award 2023 angu

Guwahati, June 23, 2023

(Agencies): Assam nung nisung pezü nem Sahitya Akademi Awards agütsüogo. Iba sempet ya kaketkeno atema agütsür.

Taküm atema Rothindranath Goswami nem Bal Sahitya Award

agütsü. Pai tanur kaketkeno mapa inyaker aser lanurtemi pa indang kakettem kanga sapua azünger.

Külen, Jintu Gitartha nem Yuva Sahitya Akademi Award agütsü. Pai lanur kaketkeno

nung shilem tajung agir.

Bodo oshi atema Mainaosri Daimary nem Yuva Sahitya Akademi Award agütsü aser Pratima Nandi Narzary nem Bal Sahitya Akademi Award agütsü.

Carol Andrea Kevichüsa-i 'Best Female Debut' award anguba atema Hyundai-i la nem gari ka agütsüba noksa nung angur. June 23, 2023 nü Vuto Hyundai, New Secretariat Road, Kohima nung sentong ka agidang Kevichüsa nem "All New Hyundai Verna" gari agütsü. 68th Hyundai Filmfare Awards 2023 nung lai Anek film atema Best Female Debut (Filmfare Award) anguba atema Hyundai-i la nem tenüngsang agütsü.



Canary Islands nung migrants noklang ana dak tema kümzük

Las Palmas, Aami/June 23 (Agencies): Spain indang Canary Islands nungi Brehostibarnü migrants 227 kümzükogo ta ketdangsür temi ashir, kong anogo ka tejakdang migrant 30 dak tema asüba osang liasü.

Migrant tem ya inflatable boats nung mener Atlantic nung aliba Lanzarote aser Gran Canaria asetkongtem anasa liasü, ta Coast Guard temi ashir.

Nisung aika mozü kidangi anir oa temang tera anepalur.

Gran Canaria anasa parnok mena aliba dinghy (ngisa agi yangluba rong tila) tziyim telungi aluba sülen migrant 30 dak tema süa alitsü südi, ta charities anati Bodhbarnü shia liasü.

Tekumzükba mapa inyaker temi tanur ka aser tebur ka tasü mang ngutet aser nisung 24 kümzük, ta Spain ketdangsür temi ashir.

Ajisüaaka charities ana - Walking Borders aser Alarm Phone - ajanga ashiba agi, iba rong nung nisung 60 shi mena liasü.

Walking Borders nungi

Helena Maleno Garzon-i tetsür pezü aser kinü tanur ka densema nisung 39 araksetm ta ashi aser Alarm Phone-i nisung 35 samar bushir ta ashi.

Iba telok anaprong yagi migrant indang rong tem mita repranger aser rong nung mena alirtem mesüra kinunger tem nungi call aruba agizüker.

Spain nunger tekumzükong rong Guardamar Caliope ya Mongulbar nikongdang iba rong atongtsü ghonda ka dang liasü, ta Spanish news agency Efe ajanga ashi.

Saka iba rong yagi ngisa agi yangluba rong ya meyari, kechiaser Morocco ketdangsür temi iba operation agir liasü aser patrol boat ka yoker liasü, koba Bodhbarnep atong, koba Spanish rescue plane kati migrant tem mena aliba rong ya ngur ghonda ter junger liasü.

Canary Islands region indang lenir Agel Victor Torres-i ibai lendong tuluka lir ta ashi aser European Union dang migration tebilemsü yaritepa aser osang agitepa telangzüba agütsüsa atema migration policy

amenoktsü ayongzüka liasü.

Canary Islands ya Africa anüolen tsütsü liaka Spain meyong lir aser migrant aika mainland Europe atongtsü teimla nung Africa nungi iba archipelago (asetkong telok aliba) bushia arur.

Western Africa-Atlantic migration route ya alima nung tamajungtiba lenmang ta züngshir aser 2022 küm migrant 543 shi iba lenmang nung asü mesüra sama, ta UN indang International Organisation for Migration (IOM) ajanga ashi.

Kasa mapang iba lenmang nung rong 45 raksaa liasü saka iba dang timba alitsü akok, kechiaser data ya kanga ajema angur, ta IOM-i ashi.

Iba lenmang nung jajartem ya timba Morocco, Mali, Senegal, Cote d'Ivoire aser Sub-Saharan Africa nungi lir, ta ashir.

Taoba hopta migrant tem noklang dak tema bena aliba rong ka Greek tziikum nung mükepoka nisung 78 asüba jangja lir saka ano aika tzi nung arakseta sür alitsü südi ta bilemer.

Israel-i amokbanga aliba West Bank nung tensa tamajungba akumer

Ramallah, Aami/June 23 (Agencies): Israel-i amokbanga aliba West Bank nung azüdokshi tasen ataloka lir aser ibai maziüoktetsü akok, ta UN-i Hokulbarnü tekumdangtsü ashi. "Tang tesüsa nisung tepsetba aser azüdokshi den o tamajung jembiba ajanga Israel aser Palestine nungertem mangatetep tali ang adoktsü," ta UN huma rights tekolakba Volker Turk-i ashi.

Israel Defence Forces

(IDF) Palestine nunger telungpur aser Jewish settlers temi pei litsü alema aiba mechi iba tesem nung tan hopta nisung 18 süogo.

Bodhbarnü Palestine nunger Urif yimtsung nung aliba West Bank mosque ka Israeli settlers temi raksatsüba nguogo, ta Israeli news outlet Haaretz-i ashi.

Mask agir nisung ka mosque nungi Quran ka bener ayazüka aoba angu aser iba sülen pai yimtung nung shisa. Israeli

human rights organisation Yesh Din ajanga iba tatalokba ya aitsü aser ibai Jewish nunger samatsütsü merangba tasa nung shilem ka lir ta ashi.

"Settlers temi maneni mapa tamajung inyaker aser army temi parnok anentsü memeranger. Video nung iba mapa inyakba ya rongrong adokdaksütsü nükjidong asoshi lir amai ajiteter," ta Yesh Din ajanga sangdong ka nung ashi.

(Maneni tapak 8 nung...)

Pakistan PM Sharif-i IMF dang sen billion \$1.1 agütsütsü ajungshi

Paris, Aami/June 23 (Agencies): Pakistan sorkari ano maneni International Monetary Fund (IMF) dang taoba küm November ita nungi magütsüi anendaka aliba sen tanungba billion \$1.1 agütsütsü ajungshi, kechiaser sen billion \$6.5 aputsü sentong June tatemi expiry asütsü lir.

Ato Kilonser Shehbaz Sharif-i Brehostibarnü Paris nung IMF managing director Kristalina Georgieva ajuru aser sen aputsüri asüngdangba ama par linüki nungdakba mera ajak agiogo ta ashi.

Pakistan-i teinyaktsü tim inyaktsü asoshi bendanga agütsür inyaker ta Sharif-i ashi, ta ato kilonser indang office ajanga sangdong ka nung ashi.

Sharif ya France nung Summit for a New Global Financial Pact nung adentsü arua lir, aser iba sen tekeraba nung agütsütsü teimla lir aser iba ya ajanga Pakistan-i rongsenkezüing jenjang tajungba akumtsü merangba nung tashi itshitsü aser nüburtem anisüngzük angutsü, ta pai ashi. 2019 küm Pakistan ya sen

billion \$6 IMF sentong ka nung ajemok, koba taoba küm ano sen million \$500 agi timba akum. Iba sentong kübok Pakistan-i taoba küm August ita sen billion \$1.17 agizükogo, koba tenet buba aser ti buba reviews nung shilem ka liasü.

Review toku buba atema jembishinü akatsü asoshi küm tetenzüklen IMF ajanga teshimtet nisungtem Pakistan-i

anogo ter atema yoka liasü saka tanungba sen ya tang tashi magütsür aser iba sentong ya June 30 nü tembangtsü lir.

Balance of payment nung timtem ajuruba, sen jenjang ajema akumba, osettsüset nung jenjang tali temlokba aser sentsüh jenti aliba ajanga Pakistan ya rongsenketzüing tsütsü timtem nung lir.

(Maneni tapak 8 nung...)

Office of the
MOPUNGCHUKET VILLAGE COUNCIL
P.O. Impur: Mokokchung; Nagaland

TENÜNGSANG AGÜTSÜR

Nagaland sorkar kübok nübur tenzükba wadang nung **Er.K.Imnajungba Jamir** ajanga **NPWD** nung **Additional Chief Engineer** tongtetba aser **Wb. Meyekokba Jamir** ajanga **Planning Department, Secretariat** nung **Assistant Development Commissioner** menden tongtetba atema Mopungchuket Village Council aser Mopungchuket Medemsanger Putu Menden ajanga nena nem konang tenüngsang tulu agütsür.

Nenoki nendaka inyaktetba ajanga asen Mopungchuket sensosanger ajak tejak tenteta pelasemer. Nübur tenzükba wadang, mangdang tuluba nung tenzüktsü anema aliba aser arishi moajang ta sarasademja onoki Tsüngrem taochi aser leniba meshizüktsür.


Arentemu
Council Chairman
Mopungchuket Village Council

Medemsanger Putu Menden tenüng nung:
 1. Inyumeren Jamir, TATAR
 2. Kartoshi Aier, TATAR
 3. Kumsangyanger Ozukum, TATAR

Mulungnen O



Asür Tsürabur Merenchila
10/01/16 - 08/06/23

Asür Tsürabur Merenchila Aonokpu, temang manemi alidang aser akümlir wadang toktsür kibuba dangi aoba anogo June ita 8th 2023 nü, Arogotem, Kiyongertem, Adianutem aser ana aser talang nungi kija kibong aser tembartem shirnokisa tamang sarasadem den rongsen, nübu agi yaritepogo, nenok ajak dang chirnur aser kinunger ajaki kanga dang pelaba lemsateper

Nenok temeim mapa tajung asoshi asen Tulusang Tsüngremi maneni moajangma ta onok sarasadem.

"Ni rara tajungji, raraogo, ni alizüing tonga asemogo, ni tamangji yuogo"
2 Timoti 4:7

Temeim Chirnurtem, Anükapang aser Semchirsemmurtem

MULUNGZEN O



Lt. Watimenla Jamir
16.03.1962 - 13-06-2023

Teti meima aliba temeim kinungtsü aser ojala, teti asoshi Kibuba dangi iba lima toktsür aoba anogo nung kinungertem, tembartem, Arogo aser lokti balala shirnokisa nebu, rongsen aser sarasadem ajanga ozü kibong den lemsatepogo nenok ajak dang kanga pelar.

Asen Kibubai nenok ajak moajang.

~Temeim kinungbu, chirnur & Semchir.

TSÜNGREM TEMOATSÜ KOPAYUA TA PELABA LEMSATEPER

Menur amai ta süaka Tsüngrem temeim, taochi aser temoatsü kopayua ta mesangdong nung Tsüngrem tsüngdang sentsüh ta bilema tangang lemsateper.

Shri. Taliwapang Imsong aser Bangerlemla Jamirtsür na jabaso **Aotushi**, 2023 HSSLC tatitang nung top 5th position ngutet. Aser ano Physics, Chemistry aser Maths nung shibai highest mark ngudir Governor of Nagaland-i Rs. 100,000 (One Lakh) agütsütsü ta nangzükba aja Aotushi-i ngutet.


Item takok konang ya, au tebo tetsü merangba lir, achi saka kanga tepelatsü tulutiba tetsü-i (Bangerlemla Jamirtsür) lai class A nungi 12th tashi takok ngutetbaji lai mezüing nungi Tsüngrem metetba nung lesson-a bendanga sayua intetdaksü.

Anungji ozü Imsongunger kin nem konang bentsür arutsübjaji la mapa ta kanga dang nüngsang.

Tsüngremi ano Aotushi nem ajemalu aser Tsüngrem aküm tsübuua alitsü kin rangbeni pelar aser sarasademtsür.

Sd/-

- 1) L. Imli Imsong, Tatar
- 2) Tsüknung Imsong, Tatar
- 3) Merenjamba Imsong, Tatar
- 4) Saku Imsong, G.B.



Kohima nung Grassroot Football Tournament temogo



Kohima, Aami/June 23 (TYO): Nagaland Football Association (NFA) kübok Kohima District Football Association (K DFA) ajanga IG Stadium Kohima nung asemnü atema ayongzükba Grassroot Football Tournament Hokulbarnü tembangogo.

Iba asayamung nung Under-10, Under-13 aser Under-15 category nung lanur asayar

noklang dak tema arua shilem agia liasü.

U-10 category nung Khelo India Centre, IGS Kohima 'A' mezüngbuba jenjang aser Children's Club tanabuba jenjang ngua liasü.

Under-13 category nung mezüngbuba jenjang Khelo India Centre Greenwood School Dimapur-i ngutet aser tanabuba jenjang Sechü Zubza

FC-i ngua liasü.

Under-15 category nung Kezekevi FC mezüngbuba jenjang aser Young Challengers FC Medziphema tanabuba jenjang nguteta liasü.

Under-10 category kübok Best Player of the Tournament sempet ya Children's Club nungi Zhothi Lohe-i angu, Under-13 category nung Sechü Zubza FC nungi Meyielie Khrodi-i angu

ascer Under-15 category nung Young Challengers FC Medziphema nungi Nouneser Thepa-i ngua liasü.

Iba asayamung tembangba sentong nung tetushi tejaoker NFA tir K Neibou Sekhose liasü aser pai state nung iba ama

asayamung ya tang mezüngbuba lir ta ashi.

Iba asayamung tembangba anogo ya All India Football Federation (AIFF) National Grassroot Day den külemi lir, koba India nung football asayar tejangja aser coach Pradeep Kumar (PR) Banerjee anoba anogomung bilemteta amunger, ta pai ashi.

Sekhose-isa AIFF ajanga Blue Cubs atema grassroot program logo sayaogo ta ashi, koba Vision 2047 nung Indian Football atema tamendak dak tajung yangertsü nukjidong lir.

Iba asayamung nung category asem nung shilem agiba team 30 liasü.

Sempet agütsüba sentong ya Medolonuo Loucü-i ketdangüsü agi aser Vilibeiizo Liezietsu-i melepzüng o jembia liasü.

Mumbai City FC-i Akash Mishra alizükogo

New Delhi, Aami/June 23 (Agencies): Mumbai City FC-i sangdong ka ajanga Hyderabad FC nungi Akash Mishra alizükba sangdongogo. Pa 2028 küm tashi iba club nungi asayatsü.

Left-back asayar ya defending ISL champions nungi küm pongu asayatsü atema tenangzüktepba yangluogo, ta media sangdong ka ajanga metetdaksü.

Akash ya Uttar Pradesh kübok Balarampur jila nungi lir aser pa mezüng school aser local asayamungtem nung dang

asaya liasü aser iba sülen pa arishi küm 14 asüba mapang 2015 küm Germany nung U Dream Football Academy-i ao.

Mishra ya 2020-21 season nung Hyderabad FC nung aden aser 2021-22 küm Hyderabad puri ISL akokba mapanga pa club nungi asaya liasü.

Pai kanga junga asayaba atema 2022 küm Football Players' Association of India-i Young Player of the Year naroküm agüja liasü.

Pa asayaba yimya dak ajemdaker pa senior Indian

national team nungi asayatsü atema shim aser Oman den 2021 küm March ita international friendly asayaba mapang India team nungi mezüngbuba asaya liasü. Pa tangbo Igor Stimac kübok team nung left-back ama teti asayar aser pai tang tashi nung India team nungi 16 ben asayar lir.

Mumbai City FC pur 2023-24 AFC Champions League nung shilem agitsü aser ISL League Shield tanaben akoktsü atema merangba mapang Akash iba club nung densemogo.

Israel-i amokbanga aliba West Bank nung tensa...

(Tapak 7 nungi...)

Arishi küm 26 tain Muhanad Shehadeh aser par medemer arishi küm 24 tain Khaled Sabah nati Palestine nung Urif yimtsüng anasa Jewish nung aliba tesem ka tezülen petrol station ka Mongulbarnü amakba sülen Israeli-Palestinian tsüngta raraba nung iba tesem ya tiyongtsü akum.

Mapang tatsüka lir Palestine nung nung ana ya Hamas kiralongrar telok den sendaktepa aliba ngutet, shirnoki Gaza Strip amokbanga lir aser

parnoki Israel nungi pezü khaseter ano pezü yirutsüba sülen parnok ajanga aor ka aser Israel army temi tena khaset.

Hombarnü Israel nungeri Jenin refugee camp mita aodang Palestine nung nisung trok tepsetba tayang kepzüka petrol station nung lendong ya agütsü, ta Hamas-i ashi.

Iba sülen Bodhbarnü settlers temi school ka nung mi senloktsü aser ano nisung aliba ki aser mosque nung mi senloktsütsü merang. Yangji

alirtemi ashiba agi, item settlers tem ya yimtsüngi Yitzhar settlement tsütsü nung aru.

Hamas den sendaktepa aliba nisung ana ya Urif yimtsüng nungi lir ta shir.

Ano Bodhbarnü Jewish settlers temi West Bank kübok Turmus Ayya jila nung nisung aliba ki aser gari nung mi senloktsü.

Iba sülen security forces aser Palestine nung tsüngta rongrong adoka arishi küm 27 tain Omar Ketin khaseta liasü.

Pakistan PM Sharif-i IMF dang sen billion \$1.1...

(Tapak 7 nungi...)

Pakistan indang central bank nung foreign currency reserves sen billion \$4 dang lir, koba agi bendang lima nungi osettsüset balala alia bener aruba hopta pezü peritsü, aser taoba küm par sen ya US dollar den medemdangra shilem 50 dak tali agi jenjang tajemba akum.

Sorkar indang data ajanga ashiba agi osettsüset jung jenjang temlokba ya shilem 38

jungnüa lir aser IMF ajanga April ita sayaba global economic outlook report nung taküm Pakistan rongsenketzüng tsütsü shilem 0.5 dang renloktsü shia lir, koba 2022 dang shilem trok agi tajemba.

Pakistan-i June ita tetenzüklen sen billion \$50 indang budget agizüka liasü.

Linüki taküm küm tatem tashinung sentsüh billion \$4 dang

timba menoktsü imlar ta Pakistan indang central bank data nung sayur, aser United States Institute of Peace ajanga tawa report ka agütsüba nung 2026 tashinung sen billion \$77 menoktsüla lir.

Pakistan ya yimtenren tsütsü mepetmesü tulu adoka lir, kong election October ita agitsü sentong lir aser parliament kümzüka August ita tembangtsü.

Women Football League Tournament atema form agütsüba anogo atsülanger

Dimapur, Aami/June 23 (TYO): Department of Youth Resources & Sports ajanga sangdong ka nung ashiba agi, Indira Gandhi Stadium, Kohima nung June 26, 2023 nungi July 1, 2023 tashi agitsü aliba 1st Open Women Football League Tournament nung shilem agitsü asoshi form agütsüba anogo June 24, 2023 tashi atsülanger.

Forms tem ya WhatsApp

ajanga tsünglanglen agüja aliba contact number dangi yoktetsü:

1. Ropfu Meyase, Jr. State Coach (Football) - 7630098992
2. Kevileibe Paphino, Coach (Football) - 9402211604

Form ya Department indang website dys.nagaland.gov.in nungi download sütetsü, ta sangdong ajangasa ashi.

IOC dang 2024 Olympics nung Russia aser Belarus nokdangtsü ajungshir

Strasbourg, Aami/June 23 (Agencies): Brehostibarnü Europe indang human rights watchdog kati, Russia-i Ukraine nung raraba manen tashi 2024 Olympics nung Russian aser Belarusian athletes tem ajunga nokdangtsü takhangba agüja liasü.

Council of Europe ajanga International Olympics Committee (IOC) aser constituent sports federations dang 2022 küm parnok tangatetba lemsatepba nung amittsü aser taruba Olympics nungi aser danga saisapong sentong tulu nung item athletes tem shilem magidaksütsü ajungshia liasü.

Taoba küm February ita nungi tenzüka Russia-i Ukraine amak tenzüka sülen Russia aser Belarus nungi athletes tem nem saisapong nung tenokdangba balala agüja arur. Ajisüka Russia aser par tembar Belarus nungi athletes temi Ukraine nung raraba tejangja bukuma menokdakra international saisapong nung 'individual neutrals' ama

toktepdaksü nung ajungtsü, ta IOC ajanga March ita shidanga liasü.

Strasbourg nung Council of Europe senden amendang, item asayar temi shilem agitsü ya khenyongi mebilettsüla, ta ashi.

Temetet parnok ya tiazü osang sangdongba hadir ama amshitsü aser kechi südir süaka dangar saisapongtem - talisa Ukraine nungertem - shilem magidaksütsü.

Russia aser Belarus atema IOC tangatetba mechi Ukraine nungi item saisapong nung shilem magitsü ta shia liasü.

"Parnok (Russia aser Belarus) shilem agidaksünüa jembiba ajanga parnoki tashiyim mapa tamajung inyakba aitsütsü nungdakba senzuka yutsür aser tanen makai nisung tepsetba asoshi linük balalai Ukraine manokshi bukuma nokdaksü nungdakba mabensatsür."

"Russian aser Belarusian elite athletes tem sorkar nungi itasen angur aser teti military sports team nung shilem agir," ta sangdong ajanga ashi.

BILEMDANGANG

"Nai tesunep aginüra dangar nem tatok agüjang."